

KABAN *ONLINE* SAMIR



JAKU TANGKAN NGAGAI PEMACHA

Pengawa menyati nembiaik tau nyadi nengah chara *online* sekaligus ari internet tauka media rama. Pengawa tu dipejalaika enggau mayuh bengkah chara bepun ari ngaga kaul ti rapit enggau nembiaik, nganjung mesej ke enda menuku, mansal tauka mejal sereta ngenakutka enggau tuju deka menyati nembiaik.

Pengawa menyati nembiaik nengah chara *online* ulih nyadi ba semua nembiaik nyengkaum iya ti ngembuan penimpang pendiau. Nembiaik ke timpang pendiau mudah agi kena penyati laban sida ngembuan penanggul ari chara berunding enggau bejaku dikena mereti, nyeliahka diri ari kena penyati tauka minta tulung ari orang bucai.


Cherita tu bekaul enggau siku nembiaik ke napi penanggul bengal ti dipenyati orang nengah chara *online*. Nembiaik ti bengal mega ngena sereta nguna internet enggau media rama sama baka nembiaik ti bucai. Sida berandau *online* enggau chara bemesej sereta ngena Jaku Isyarat lebu ngaga *video call*. Enti nyema nembiaik nya diau kediri tauka sunyi, dia sida mudah agi nyadi mansa dipenyati orang nengah chara *online*.




Samir iya nya siku nembiaak beumur
15 taun ke napi penganggul bengal.
Iya besekula ba Sekula Sekondari
Pelajar Khas.



Samir diau ba buding. Apai enggau
indai iya ngabas iya sebulan sekali.



Samir siku nembiak ke enda pejaku.
Maya udah tembu belajar, Samir ulih
ngena telefon binching iya enggau
pemendar ari warden sekula dikena iya
bemesej enggau apai enggau indai iya
sereta bermain *online games*.



Hari siti lebuah Samir bemain *online game*, iya nerima peminta nyadi kaban ari siku indu ke benama Candy. Iya pan besetuju.



Iya terus nerima saut ari Candy.
“Hai Samir, manah amat skor nuan!
Arap endar aku ulih bemain baka nuan!”



Samir tekenyit tang iya berasai gaga laban
bisi orang indu ngelala sereta muji iya.



Lemai siti, Samir meda Candy
benung *online*. Candy pan lalu mesej iya,
“Aku rinduka chara nuan bermain, Samir.
Nuan chukup landik!”




Candy seruan mesej Samir tiap kali iya bisi *online*. Candy suah nanyaka chara bermain *game* ari iya. Keterubah iya, Samir malu tang ujung-ujung iya pan besetuju deka ngajar Candy.



Enda lama udah nya, Candy berengkah nanya Samir pasal diri iya, sekula iya enggau bala kaban iya. Samir pan lalu bekunsi pasal diri iya empu, penanggul iya ti bengal, alai iya besekula sereta baka ni gaya pengidup iya ti sunyi.




Candy lalu madah, “Aku ulih ngasaika utai ke diasaika nuan. Aku pan bengal baka nuan. Nya alai, aku deka nyadi kaban nuan. Nuan tau arapka aku.”



Samir enggau Candy pan betukar
numur telefon lalu bemesej
enggau pangan diri ninting hari.



Lemai siti Samir mesej Candy mai iya betemu. Candy nyaut, “Baka ni enti tua nganjung gambar pangan diri aja dulu? Laban aku malu”.



Samir pan ngambi gambar diri iya
empu lalu dianjung iya ngagai Candy.
Candy lalu nyaut, “Apu, amat sigat
gamal nuan!”



Candy mega nganjung gambar diri iya empu.
Samir bejaku dalam ati, “Apu! Amat bajik
mua Candy. Untung endar aku.”
Samir enggau Candy pan lalu suah
betukar gambar enggau pangan diri.



Hari siti Candy mesej Samir, “Aku deka ngelala nuan enggau semak agi Samir... nyadika pangan aku”. Samir lalu nerima gambar Candy ti nadai bebaju.



Samir berasai malu sereta enda nemu
nama utai ke patut digaga. Candy mega
ngasuh Samir nganjung gambar iya empu ti
enda bebaju. Samir enda nyaut seleka jaku.



Udah nya, Candy mesej iya baru,
“Enda ngawa enti nuan enggai, Samir.
Ila aku ngiga pangan ke deka arap agi ka aku.”
Enggau ati ti berat, Samir pan lalu nganjung
gambar iya ti enda bebaju ngagai Candy.



Candy lalu nyaut, “Enda sabar aku deka betemu enggau nuan”, lalu minta mayuh agi gambar Samir ke enda be baju.

Samir irau enggaika Candy ninggalka iya. Nya alai, iya ngereja tiap utai ke dipinta Candy.



Beberapa hari udah nya, Candy mai
Samir betemu ba luar pagar sekula
jam 6 lemai hari siti.




Lebuh Samir nurun betemu enggau Candy,
iya meda siku lelaki ti nunjuk ngagai
telefon binching Samir. Samir pan malik
ngagai telefon iya lalu tepedaka mesej,
“Hello, aku tu Candy.”




Samir berasai chukup tekenyit. Lelaki nya tadi lalu ngayanka telefon binching iya ngagai Samir. Samir meda semua gambar iya ti enda bebaju ke dianjung iya ngagai Candy.



Lelaki nya lalu mesej Samir minta duit ari iya. Enti nyema Samir enda meri duit ke dipinta, iya deka *upload* semua gambar Samir ti enda bebaju ba media rama. Iya mesej Samir madahka diri deka ngambi duit nya pagila lalu terus mupuk.




Samir enda nemu nama utai ke patut
digaga iya. Iya enda ngadang sekali
'Candy' ke bendar iya nya siku lelaki
ke deka ngulihka duit ari iya.





Samir berasai chukup irau. Iya berunding,
“Baka ni mih enti semua gambar aku
di-*upload* iya ba media rama?”



Hari siti, Samir betemu enggau lelaki nya lalu meri nyampau duit ke dipinta iya. Lelaki nya pan lalu minta mayuh agi duit ari Samir. Iya mesej Samir madahka diri deka datai baru hari Satu minggu baru.



Lelaki nya madahka Samir semua gambar iya deka di-*upload* enti nyema iya nusui ngagai orang bukai. Laban ke takut, Samir pan besetuju deka meri duit ngagai lelaki nya baru.



Tukang kebun sekula, Aya Somi, suah tepedaka Samir betemu enggau siku lelaki ba luar pagar sekula tiap lemai hari Satu. Iya pan bisi meda Samir meri duit ngagai lelaki nya. Aya Somi lalu ngeriput ngagai warden sekula, Pengajar Alex.



Hari Satu minggu siti, Pengajar Alex nganti ba pagar sekula laban deka meda nama utai ke nyadi. Lebu Samir pulai, Pengajar Alex negu bau iya lalu nanya, “Sapa lelaki nya? Nama kebuah nuan meri iya duit?”



Samir enda nyaut. Iya ingatka jaku lelaki nya.
Iya berasai takut. Pengajar Alex nanya baru,
“Nama nuan bisi penanggul? Padah ngagai
aku awakka aku ulih nulung nuan.”




Samir pan lalu nusui ngagai Pengajar Alex
pasal 'Candy', gambar ke dianjung iya
sereta duit ke diberi iya ngagai lelaki nya.
Pengajar Alex berasai chukup tekenyit.




Pengajar Alex bejaku enggau Samir,
“Lelaki nya udah menyati nuan lalu diatu iya
deka ngenakutka nuan. Ukai salah nuan nya.
Kitai patut nagang pekara tu ari terus nyadi.”



Pengajar Alex lalu beguai madahka pekara
nya ngagai apai enggau indai Samir.
Seduai iya pan datai ke sekula lalu terus
ngaga riput pulis enggau Pengajar Alex.




Hari Satu minggu siti, lebuah lelaki nya datai deka ngambi duit ari Samir, iya pan ditangkap pulis. Pulis mega bisi tetemuka gambar Samir enggau nembiak lelaki sereta nembiak indu ke bukai ba telefon binching lelaki nya tadi.



Ingat pekara tu: Lebu nuan *online*, anang sekali-kali bekunsi pekara pasal diri nuan empu tauka gambar nuan enggau orang ke enda dikelala.

Enti nyema kaban *online* nuan bisi ngasuh nuan berasai enda nyamai ati, enda lantang runding sereta ngenakutka nuan, padahal mih ngagai orang besai tuai ke dikarapka nuan pasal pekara ke nyadi. Nya mih chara dikena nuan minta tulung sereta nagang diri ari terus dipenyati.



Isi gelembung tu ngena nama orang ke ulih
dikarapka nuan sereta ulih mantu nuan.



Pusat Pengubah Pendiau Orang Indu (Women's Centre for Change) iya nya siti gerempung ti enda ngiga penguntung ke ngembuan tuju dikena nagang orang indu enggau nembiaak ari diperinsa tauka dipenyati, mandangka hak sama rata antara indu enggau lelaki sereta atur ke enda bechiping dalam komuniti.

Penulis

Prema E. Devaraj

Pengalih Jaku Ngagai Jaku Iban

Camelia Natasha anak Linggoh @ Lingoh

Pelukis Kartun

Faizati Mohd Ali

Besai Terima Kasih nuju

Lucy Lim Yoke Kwan

Tusun Atur enggau Desain

C-Square Sdn Bhd, Penang

Pengeluar enggau Penerbit

Pusat Pengubah Pendiau Orang Indu (Women's Centre for Change)

Disukung ulih



Copyright © 2023, Women's Centre for Change, Penang



www.wccpenang.org



Women's Centre for Change

241, Jalan Burma, 10350 Penang, Malaysia.

+604-228 0342 +6011-3108 4001 wcc@wccpenang.org

Pusat Perkhidmatan Wanita (PPW)

13, Lorong Sutera 6, Taman Sutera, 13700 Seberang Jaya, Penang, Malaysia.

+604-398 8340 +6016-439 0698 ppw@wccpenang.org

    WCC Penang